

ALAHADY PAKA III - TAONA D2019



« Dia nanatona i Jesoa, nandray ny mofo, sy nanome azy ireo » (Jo. 21 : 13)»

Ry Kristianina havana, mbola ao anatin'ny Alahady fankalazana ny Paka isika. Isaky ny Alahady dia omen'ny Eglizy lohahevitra iray isika hibanjinantsika ny toetran'i Kristy mba hianarantsika hiaina ny toetrany ka hahatonga antsika ho Kristianina, Kristy mpiara-belona amin'olona. Isika izao no mpamafy ny fiadanana sy fanantenana fa indrindra amin'izao fiomanantsika ny handraisana an'i Papa Fransoa sy fitokanana ny Notre-Dame de la Route eto amintsika Antsiranana. Ho tahaka an'i Papa Fransoa isika, ho tahaka an'i Masina Maria hirahina hamafy ny fiadanana sy fanantenana. Ka ny fomba ho entintsika hiaina an'izany dia ny fampiasantsika ny "chapelle portable" izany hoe ny fanaovantsika ny sapile, ny sapile entintsika amin'ny toerana rehetra misy antsika na amin'ny fianakaviana Eglizy kely, na amin'ny Eglizy fiombonana, na amin'ny Eglizy fototra, na amin'ny Eglizy iraka na eny amin'ny toeram-piasana na an-tsekoly na amin'ny toerana maro samihafa hamafazantsika ny fiadanana sy ny fanantenana. Hafaliana no hanenika ny fiainantsika raha mamafy ny fiadanana isika.

Vakiteny I : Asa 5, 27b-32. 40b-41
Tononkira : Salamo 29
Vakiteny II : Apôk. 5, 11-14
Evanjely : Jo. 21, 1-19

Tamin'ny Alahady lasa dia nibanjina an'i Kristy mpamindra fo isika mba hahatonga antsika koa ho mpamindra fo. Nampianatra antsika i Md Thomas raha nanao ny fiekem-pinoana "Tompoko sy Andriamanitra" na dia eo aza ny fisalasalana dia fantaro fa i Jesoa nilaza hoe "Sambatra izay mino nefa tsy nahita". Izany hasambarana izany no entintsika mamafy ny fanantenana sy ny fiadanana eo anivontsika.

Amin'izao Alahady fahatelo izao dia ireo mpianatra miverina amin'ny asan'izy ireo andavanandro izany hoe niverina amin'ny maha-mpanarato azy ireo nefa tsy nahazo na inona na inona ka tonga teo aminy I Jesoa nankahery azy ireo sy naniraka azy ireo hoe "*Alatsaho ao ankavanan'ny sambo kely àry ny haratonareo, fa hahazo ianareo*", I Jesoa velona tokoa eo anivontsika no banjinintsika androany. Koa amin'ny asa rehetra sahanintsika sy iandraketantsika, miaraha amin'I Jesoa fa velona izy ary manampy antsika hamokatra. Jesoa miara-dàlana amintsika, mihaino antsika sy mampianatra antsika satria velona izy ary mizara ny ainy ho antsika.

Fantantsika ny tantaran'ny mpianatra Emaosy, izy ireo feno fisalasalana teny an-dàlana ka rehefa nampianarin'i Jesoa tamin'ny alalan'ny Soratra Masina ka nandalina ny finoana dia nisokafan'i Jesoa ny fo amam-panahin'izy ireo fa indrindra rehefa nankalaza ny Eokaristia izy ireo. Tsy hitany intsony anefa I Jesoa fa ny fon'izy ireo kosa dia nirehidrehitra sy nahafantatra fa velona I Kristy noho ny herin'ny Fanahy masina. Ka ny evanjely androany manambara koa fa noho ny herin'ny Fanahy masina dia nahafantantra an'I Kristy izy ireo ka mirehidrehitra ny fony. Tsy firehankevitra i Jesoa fa olona velona eo anivontsika izy, olona zay miara-dàlana amintsika isanandro isanandro. Izany ny finoantsika. Tsy Andriamanitra lavitra ny Andriamanintsika fa eo anivontsika.

Jesoa nanaiky ho faty na dia tsy nanota aza sy nandresy ny fahafatesana ka velona izy eo anivontsika ary mizara amintsika izany fahasoavana fa velona ao amintsika izy. Tsy matoatoa izy na angatra fa olona velona eo anivontsika. Na dia izany aza dia efa voalazany fa tsy maintsy nijaly izy ary maty nefa nitsangan-ko velona. Izany no làlam-piainantsika raha miombona aminy isika, tsy maintsy mijaly nefa mandresy miaraka aminy. Isika izao no Kristy mpiara-belona ka vavolombelon'izany fahasoavan'I Kristy velona izany ka aoka isika ho mpizara ny vaovao mahafaly sy hiaina ny hafaliana miaraka amin'ireo manodidina antsika.

Ny vakiteny voalohany manambara fa I Piera nisolo vava ireo mpianatra ka nilaza ampahibemaso ny fototry ny finoana "*kérygme*" izany hoe ny fizarana ny vaovao mahafaly "*I Jesoa zanak'Andriamanitra dia nofantsihana tamin'ny hazo fijaliana tamin'ny andron'I Pilaty, novonoina izy, nijanona tao am-pasana fa nitsangan-ko velona ary izahay ireto no vavolombelon'izany*".

Isika koa no vavolombelona amin'izao androntsika izao ka mpamafy ny fanantenana amin'ireo kivy sy ireo feno tebiteby satria entanin'I Paka izay finoantsika isika. tsy hoe firehan-kevitra no zaraintsika fa i Kristy velona no mahatonga antsika ho zanak'Andriamanitra. Ny làlana sy ny fonompianarana androany dia ny fibebahana, hain'Andriamanitra ny manavao ny fiainantsika, hain'Andriamanitra ny manova ny fiainantsika ho fiainana lavorary koa mivaloza, mibebaha mba hiala amin'ny fahotana isika. Izany no nambaran'i Piera tamin'ireo nihaino azy, izany koa no ambara amintsika mianakavy amin'izao Alahady fahatelo amin'ny Paka izao. Miroso tokoa ny fiainantsika ka mikendry fiainana tsaratsara kokoa isika araky ny voalaza amin'ny vakiteny faharoa androany, "*izy no nandray ny helokantsika rehetra, izy no sorona ho antsika, izy izay tsy nanota nanaiky ho fahotana mba hahatonga antsika ho zanak'Andriamanitra, izy no*

mpisolovava antsika amin'ny Ray, izy no mpanelanelana antsika," izany fanelanelanana izany dia vokatry ny fanoloran-tenany. Isika izao no Kristy mpiara-belona amin'olona ka aoka isika mba handray izany hafatr'Andriamanitra izany hahatonga antsika ho mpiara-belona amin'olona tokoa amin'ny ataontsika rehetra ka hahatonga antsika ho olom-baovao ao amin'Andriamanitra, ho mpiara-miasa amin'Andriamanitra tokoa isika, mpiara-miasa amin'I Piera, amin'I Papa Fransoa izay hamangy antsika. Aoka isika mba ho mpamafy fanantenana, ho mpamafy fiadanana tokoa eo amin'ny mpiara-belona amintsika.

Ry Jesoa Kristy Tompo ô, nampianarinao anay androany fa eo anivonay tokoa ianao, velona ianao ary mamelona anay ka enga anay izahay hahay hamafy izany vaovao mahafaly izany tahaka ireo apôstôly. Ampio izahay ho tena vavolombelonao tokoa, ny Fanahinao masina anie hahatonga anay ho Kristy mpiara-belona amin'ireo manodidina anay. Ampianaro izahay hahay hitarika ny olombelona eo amin'ny fahasoavanao mba ho oloaraiky aminao anie izahay, ampio izahay mba hiroso lalindalina amin'ny fandalinana ny finoana ka ho vonona hamafy fanantenana sy fiadanana tokoa anie izahay rehetra fa indrindra ho tonga EOv mpanorina ETA izahay ka ho tena génération mpanorina, mpamafy fiadanana, mpamafy fanantenana. Amen

Mompera Arseveka Benjamin Ramaroson